

2 TIMOTEO

Puráka'aloji San Pablo wakára'akare piño Timotéojlo marí

1 ¹Pablo liyá marí, Jesucristo wakára'akarena nakiyana nuká. Tupana wakára'ari nuká, nu'umakáloje Jesucristo i'imataka iná kapichákajo liyá yukuna ajopánajlo, ajopánajlo ke. Ripalamane i'imakana aú iná i'imajé matajnako je'echú chu. Rimaká rinaku i'imaká, ke iná i'imajika re. ²Nojalaka piká Timoteo, íki'ija nuwátakare. Nuwata wara'apá Tupana, eyá wawakára'ajeri Jesucristo we'epika pimu'ují; nuwata kaja nala'aká pipechu palá, pikawíla'ako piyá nakaje nakú

Palá Tupana la'aká Pablo yukuna marí

³Tupana wa'até nupura'akó kewá nupura'akó pinaku. “Palá pila'aká nuká”, ke numaká rijló. Rijwa'até jápajeri nuká. Palá nupechu nakú nakaje i'imaká ejé nula'á rijló nakaje, nuchi'iná michuna la'aká rijló nakaje i'imaká ke kaja. ⁴Re jo'ó kaja nuwe'epika meke pipechu la'akó kamu'ují wani, no'opáñaaka pi'imaká wakajé. Kajrú piyaka nu'umaká. Chuwa nuwata wani pichaje i'ijnakana, pu'ují nupechu i'imakáloje raú. ⁵Nuwe'epí kewaka pipechu kaphí Tupana chojé. Pipiyá kaphí paló Eunice pechu i'imaká, ñaké kaja piruta Loida pechu i'imaká kaphí richojé. Nuwe'epí napechu i'imaká ke kaja pipechu Tupana chojé kaphí.

⁶Ñaké i'imakale numá pijló marí ke: Noto'otaka nuyáthe'ela pinakojé i'imaká wakajé, Tupana a'arí pijló we'epíkaje, pila'akáloje nakaje riwátaka ke raú penaje. Me'etení pipa'ó piño rila'ajé ñaké. ⁷Unká Tupana a'alá wajló Ripechu, we'emakáloje kero'okajo nakú. Ripechu ja'apiyá i'imakana aú wawata Tupana íki'ija, ajopana ina'ukena wa'até, raú kaja wapechu i'imá kaphí. Ripechu aú kaja iná pala'atá iná péchuwa, iná la'aká piyá pu'uwaré.

⁸Ñaké i'imakale, papáña'aniño Jesucristo nakú pura'akano ja'apí; papáña'aniño kaja no'opí. Ina'uké wajákelana chu nuká me'etení, noma'akale Jesucristo ja'apiyá. Tupana i'imataka iná

kapichákajo liyá yukuna i'imakana jimaje ne'iyajena la'año iná chapú. Nala'ajé kaja chapú piká rijimaje, eko pijña'á panaku riká.

⁹Tupana i'imatari weká kapichákajo liyá, we'emakáloje rile'ejena ina'ukena. Unká na kalé wala'á i'imaká, ri'imatákalaje weká kapichákajo liyá; Jesucristo palamane aú ja kalé ri'imatá weká richiyá. Kaja keja Tupana pechu nakú wala'akana i'imaká, íki'ija wani riwátakale weká. Unká chiyó rikeño'ota eja'awá i'imaká, we'emá ripechu nakú. ¹⁰Kaja chuwa wawe'epí riwajwena wani weká, riwakára'akale Jesucristo majó i'imaká we'ematájeri penaje. Jesucristo chá'atari taka'akaje i'imaká. Tupana i'imatari iná kapichákajo liyá Jesucristo palamane aú, iná i'imakáloje matajnako rijwa'até je'echú chu.

¹¹Ñaké i'imakale, Tupana wakára'ari nuká, nu'umakáloje riyukuna ajopánajlo. Ra'á kaja nuká Jesucristo wakára'akarena nakiyana penaje, nowíña'atakaloje ajopana, unká judíona kalé i'imakáñojlo rinaku. ¹²Rijimaje nala'á nuká chapú me'etení, e'iyonaja kalé unká nopáña'alo raú, kaphí nupechu i'imakale Tupana chojé. Kaja nuyurí nokó rijló, raú nuwe'epí palá ra'ajika rinakojó nuká, a'ajná nu'umajika rijwa'até wakajé ejená.

¹³Palá nowíña'ataka pi'imaká kewákaje puráka'aloji nakú, richojé pila'á kaphí pipéchuwa. Íki'ija Tupana wátakarena weká, Jesucristo ja'apiyá jema'ajeño we'emakale. ¹⁴Eko Tupana Pechu, weká ra'apiyá jema'ajeño e'iyá i'imakare, a'á piñathé pa'akáloje pinakojó palani puráka'aloji no'opátakare pijló i'imaká.

¹⁵Kaja piwe'epí piyukeja maare nujwa'até, Asia te'eré eyájena i'imakaño, yurika nuká nokó. Figelo, Hermógenes wa'até, ja'apáñaño kaja nuká. ¹⁶Nuwata Tupana la'aká palá wani Onesíforo, riyajalo, riyani, kele nakú. Pulapé ripala'ataka nojló nupechu, ina'uké wajákelana chu nu'umaká wakajé, unká rapáña'alo no'opí i'imaká. ¹⁷Roma ejo riphaka i'imaká wakajé, rikulá nu'umaká, a'ajná riphátaka nuká ejená. ¹⁸Éfeso e we'emaké wakajé, rila'á kaja wanaku palá i'imaká, piwe'epíkare nakojé. Ilé ke rila'akale nuká palá, nuwata Tupana la'aká riká palá wani, je'echú chu ri'imajika wakajé. Re Jesucristo kemájeri piyukeja ina'uké nakú mékeka rijló nakaje nala'akare, marí eja'awá chu ne'emaká ketana.

Chapú kaje ña'akana panaku yukuna marí

2 ¹Nu'urí ke nojló piká, Timoteo. Jesucristo palamane weká, ñakele pipechu i'imá kaphí, ripalamane pi'imakale. ²Pi'imaká nujwa'até wakajé, nowíña'atajika kajrú ina'ukena

Tupana puráka'alo nakú. Riká puráka'alo, pema'akare riwakajé nakú, pewíña'ataje ajopana achiñana, na'apátakaloje kaja riyukuna ajopánajlo. Kaliyáruna, eyá palá we'epíkaño ina'uké jewíña'atakana, pewíña'ataje rinaku, na'apátakaloje riyukuna ajopánajlo penaje.

³Suráana ña'año chapú kaje panaku, nema'akale nawakára'ajeri ja'apiyá. Ñaké kaja pijña'aká chapú kaje yajwé panaku, pema'akale piwakára'ajeri Jesucristo ja'apiyá. ⁴Unká suráana la'alá najápaka'ala nañakajela ewá. Nawakára'ajeri kemaká najló, keja nala'aká nakaje piyuke. ⁵Ñaké kaja bola nakú kátajeñojlo riká: unká na'alá najló nachá'ataka wemí, unkachu nakátalo namájeri kemaká najló ke. ⁶Kamenani jápari rimena e'iyá, a'ajnejí i'imakáloje rijló penaje. Kachuwa nakú nakaje tawá'ako rijló re'iyá. Riphaka rená chojé wakajé, riká i'ijnari paineko nakaje ña'ajé rijluwa re'iyayá. ⁷Pi'ijnatá palá pipéchuwa riká numakare pijló nakú; Jesucristo la'ajeri palá pipechu, piwe'epíkaloje rinakojé penaje.

⁸Piwe'epí mékeka Jesucristo i'imaká. Ne'emakana David michú lakemi ri'imaká marí eja'awá chu. Ritaka'aká i'imaká ejomi, rimakápo'o piño. Tupana i'imataka iná kapichákajo liyá yukuna nu'umá najló no'opaka ewá. ⁹Nujña'á chapú kaje panaku me'etení, nu'umakale riyukuna ajopánajlo. Kaja jepo'okeja nuká kureti aú no'onapitá, nu'umá nakiyá wa'ató. Unká ina'ukélari ke wani nala'aká nuká, e'iyonaja unká meke nala'alaje ajopana ina'ukena, nema'aká piyá Tupana puráka'alo. ¹⁰Nujña'á panaku riká, nuwátakale neká, Tupana i'iwapakárena rijluwa ajopana ina'ukena e'iyayá, i'imakó kapichákajo liyá Jesucristo palamane aú, ne'emakáloje matajnako je'echú chu.

¹¹Marí puráka'aloji wemakare nakú, kewaka wani:

“Kaja taka'akaño ke weká, Jesucristo taka'akale wapumí chojé i'imaká.

Ñakele we'emajé piño rijwa'até je'echú chu.

¹²Wajña'ajika ee chapú kaje yajwé panaku maare eja'awá chu, je'echú chu we'emajika wakajé, we'emajé ajopana wakára'ajeño rijwa'até.


Wamicho'otájika ee richaya maare,
ñaké kaja rimicho'otájika wachaya re.

¹³Unká ka'ajná wala'alá piyukeja nakaje Tupana wakára'aka ke, e'iyonaja ñakeja rila'ajika wanaku palá rimaká ke.

Unká méño'oyo Tupana la'alá apo'ojó nakaje rimaká liyá”, ke wemaká.

Tupana wa'até jápajeri yukuna marí

14 Eko pimá piño pijwa'atéjenajlo Tupana jimaje ke, nakha'ákako piyá pajwa'atéchaka mapéjari puráka'aloji jimaje. Unká na penaje pajwa'atéchaka akha'ákakano i'imalá, rapichátaja rema'ajeño pechu. **15** Pila'á palá pipechu lokópa'alaja, pi'imakáloje palá Tupana wa'até jápajeri penaje riwátaka ke, raú unká papáña'alo nakaje pila'ajíkare ja'apí. Pewíña'o kaja palá Tupana puráka'alo nakú, pewíña'atakaloje ina'uké rinaku palá. **16** Pipura'aniño ajopana wa'até mapéjari puráka'aloji, unká na penaje kalé i'imakare nakú, unká Tupana liyaje kalé riká. Ilé kaje puráka'aloji jema'akana pachá iná yurí iná liyó Tupana puráka'alo ja'apiyá jema'akana. **17** Che'erá ajñátaka iná napona nakiyá iná wejápáno, wejápáno, keja kaja rika'aká iná pechu nakiyá Tupana puráka'alo wejápáno wejápáno ke. Náké kaja Himeneo, Fileto wa'até, jewíña'ataka neká rinaku. **18** Kaja nayurí naliyó kewákaje puráka'aloji ja'apiyá i'imakana. Chuwa marí ke nemaká: “Ina'uké taka'akaño i'imaká, kaja makápo'oño piño i'imaká”, ke. Ilé kaje aú napichata ne'iyajena pechu, napechu i'imaká piyá kaphí



Jesucristo chojé. **19** Unká na kalé apiyákajeri nakaje Tupana kemakare nakú; rimaká rinaku keja ri'imajika. Rimá i'imaká: “Wawakára'ajeri Tupana we'epiri mékajenaka ina'ukena rile'ejena”, ke. Rimá piño marí ke: “Piyuke Jesucristo ja'apiyá i'imakaño yuriño naliyó pu'uwaré la'akana”, ke rimaká.

20 Pají ñópo'ojlo chu re kajrú nakaje piyukeja, re waja nakaje richu: tiyela, paratú, i'ichilá, kaje maká. Re kaja nakaje uwiru (oro) nakiyá la'akanami ka'ajná, sereni nakiyá la'akanami ka'ajná richu; re kaja richu nakaje pukapé nakiyá ipukánami; re kaja richu nakaje mirapewa nakiyá la'akanami kaje; re kaja richu i'ichí, iná

akho'okare chojé juni we'echú ka'alá keja; re kaja richu tiyela palá lamá'atakanami, nakho'okáloje nakaje jalá richojé nachaje iphákañojlo penaje. Riká penájeja kalé nawata riká tiyela. ²¹Naké wajló riká. Iná ka'á piyuke pu'uwaré iná la'akare iná nakiyó, raú palani iná Tupánajlo, riwakára'akaloje iná la'aká nakaje palá rijló. Ilé tiyela i'imaká paminajlo, ke kaja iná i'imaká rijló raú.

²²Pi'imá u'upejlú pimanáicho la'akana liyá, kajrú walijímakana la'aká ke. Pipechu i'imá kaphí Tupana chojé; piwata kaja íki'ija riká, ajopana ina'ukena wa'até. Pipechu i'imá kaja palá; pika'á pipechu nakiyá nakaje pikawíla'akaro nakú. Ilé ke pi'imajika ajopana Tupana ja'apiyá jema'ajeño wa'até. Rijwa'até pura'ajeño neká, kaja Tupana ka'á nanakiyá pu'uwaré nala'akare. ²³Pa'aniña kaja pinakojó puráka'aloji mapéjari i'imakare, napura'akaro nakú. Ilé kaje puráka'aloji jimaje nakha'ákako pajwa'atéchaka. ²⁴Unká Tupana wa'até jápajeri i'imalá akha'ákakajo nakú. Palá riká piyukeja ina'uké wa'até; palá kaja rewíña'ataka neká; unká kaja riyúcha'alo kiñaja nachá. ²⁵Tupana wa'até jápajeri la'arí kaja unká jema'alaño Tupana ja'apiyá jenakú, nala'akáloje palá penaje. Unká kaja rila'alá rikó we'epiri ke najló. Ilé kaje aú ka'ajná Tupana a'ajeri nañathé, napajno'otákaloje napéchuwa Tupana ejo, pu'uwaré nala'akare liyá, ne'emakáloje reyá a'ajná ño'ojó kewákaje puráka'aloji ja'apiyá. Penaje iná pura'ó najwa'até, ²⁶raú ka'ajná nala'ajé kewaka riká, eyá nayureje naliyó Jiñá Chi'inárikana wátaka ke la'akana. Kaja kamejeri patajona chu ke neká, ñakele nala'á riwakára'aka ke.

Mékeka ina'uké la'ajika kaja penaje wakajé yukuna marí

3 ¹Pema'á marí: Kaja penaje eja'awá iphájika rená chojé wakajé, kajrú ina'ukena amájika chapú kaje yajwé. ²Marí ke ina'uké i'imajika riwakajé: Khaí we'epíkaño nanakuwá i'imajeño kajrú riwakajé. Liñeru i'imajeri nawajwé wani; nala'ajé nanakuwá ajopana chá'atajeño ke wani. Unká kaja nayani jema'alaje nachí'iná ja'apiyá. Unká kaja nawe'epílaje “Palá pila'aká weká”, ke kemakana palá la'akaño nekajlo. Unká kaja nawátala Tupana nakojé we'epíkana; ³unká kaja nawe'epílaje khaí ina'uké nakú; unká kaja nawe'epílaje ina'uké mu'ují. Kajrú kaja nachapújra'ajiko panakuwáaka. Namanáicho la'akana apú wa'até, apú wa'até ke, i'imajeri nawakára'ajeri ke. Chapú wani kaja nala'ajika ajopana ina'ukena; unká wani nawátalaje palá la'akaná. ⁴Nemaje kaja nanakiyana nakú, chapú nanaku péchurunajlo, nala'akáloje

neká chapú penaje. Mapechuru ke nala'ajika nakaje. Nala'ajé nanakuwá nakaje nakuwá we'epéjeño ke wani. Tupana chaje nawátaje nakaje la'akare napechu pu'ují. ⁵Nala'ajé nanakuwá mapeja Tupana ja'apiyá jema'ajeño wani ke, e'iyonaja nakaje nala'ajíkare aú iná we'epeje unká ñaké kalé neká, un kale nayurila Tupana apiyákaka napechu. Ilé kajena i'imakaño, pi'imaniña najwáke'ewe. ⁶Nanakiyana i'ijnaño ajopana ñakaré chojé, ajopana ñakaré chojé ke, napajlákaloje inaana, unká kaphí kalé péchuruna i'imakaño najló wa'até, kaja ñaké kaja pu'uwaré la'akana i'imakale napechu nakú. ⁷Kajena inaana wátaño ajopana puráka'alo, ajopana puráka'alo ke jema'akana, e'iyonaja napechu je'eló kewákaje puráka'aloji ja'apejé. Neká kajena wa'até napajlá. ⁸Júpimi Janes michú, Jambres michú, kele unká wani wátalaño Moisés michú puráka'alo ja'apiyá jema'akana i'imaká. Ñaké kaja neká numakárena nakú, unká wani na'alá nakojó kewákaje puráka'aloji, unká napechu iphala rilokópa'ala. ⁹Meketánaja ne'emajika ñaké. Rejomí piyuke ina'uké we'epéjeño mapechúruna neká, Janes michú, Jambres michú wa'até, i'imaká ke kaja. Unká wátalaño Moisés michú ne'emaká.^a

¹⁰Eyá piká la'arí palá, nowíña'ataka pi'imaká ke; nupechu ke kaja pipechu me'etení; nula'aká ri'imaká, ke kaja pila'aká nópumi riká; nakaje nuwe'epíkare la'akana nutukumó, ke kaja piwe'epika rila'akana pitukumó; kaphí nupechu i'imaká Tupana chojé, ke kaja pipechu kaphí richojé. Unká nupechu i'imalá ujwí Tupana nakú; ñaké kaja piká, unká pipechu i'imalá ujwí rinaku. Unká kaja nomala ujwí ajopana ina'ukena; ñaké kaja piká, unká pamala ujwí ajopana ina'ukena. Kaliyani nuká Tupana jápaka'ala la'akanajlo; kaliyani kaja piká, pila'akáloje ñaké penaje. ¹¹Nala'aké nuká chapú, noma'akale Jesucristo ja'apiyá; ñaké kaja nala'ajika piká chapú. Nujña'á kaja chapú kaje yajwé panaku. Kaja piwe'epí mékeka nala'ajika nuká chapú wani i'imajika, pajimila Antioquía e nu'umaké wakajé. Ñaké kaja nala'aká nu'umaká pajimila Ikonio e, Listra e nu'umaké wakajé. Chapú nala'ajika nuká rewá i'imaká, e'iyonaja kalé Tupana i'imatari nuká naliyá. ¹²Marí keja riká: Iná we'epíkachu iná tukumó Jesucristo wátaka ke la'akana, ajopana ina'ukena la'ajeño iná chapú. ¹³Pu'uwaré la'ajeño la'año richájeno ke wani pu'uwaré. Ñaké kaja pajlákachina pajlaka richájeno ke

a 3:9 Éxodo 7:11 Janes, Jambres, kele i'imaño faraón mari'ichútena ka'ajná i'imaká.

wani pajwa'atéchaka. Kajrú kaja napajlaka ajopana ina'ukena wa'até; nema'á kaja pajlakaje na'apiyá.

¹⁴Pijló numá: Pi'imá ñakeja wani kewákaje puráka'aloji ja'apiyá jema'akana nakú. Kaja newíña'ata piká rinaku i'imaká; kaja piwe'epí pijluwa kewaka riká; piwe'epí kaja mékajenaka jewíña'ataño pi'imaká. ¹⁵Pijyuwako eyá piwe'epí Tupana puráka'alo lana'akéjami nakojé maárejecha, raú piwe'epí mékeka Tupana i'imataka iná kapichákajo liyá. Tupana puráka'alo kemari marí ke: “Iná pechu i'imakachu kaphí Jesucristo chojé, Tupana i'imatari iná kapichákajo liyá”. ¹⁶Piyuke Tupana puráka'alo lana'akéjami nalana'á ra'apiyá i'imaká, rewíña'atakaloje weká Tupana nakú. Raú kaja rila'á wenakú, wala'akáloje palá ra'apiyá jema'akana aú, ñakele palani inajlo Tupana puráka'alo. Rewíña'ata iná palá kewákaje puráka'aloji nakú; rakha'á kaja weká pu'uaré wala'akare pachá; rimá kaja wajló pu'uaré ajopana la'akare nakú, wala'aká piyá ñaké kaja. Palá wani Tupana puráka'alo jewíña'ataka weká, we'emakáloje palá ra'apiyá penaje. ¹⁷Tupana ja'apiyá jema'ajéñojlo penaje Tupana puráka'alo lana'akéjami, nawe'epíkaloje ke'iyapejé palá la'akaná nakojé raú penaje.

4 ¹Tupana, Jesucristo wa'até, jimaje ke numaká pijló, pi'imakáloje ina'ukejlo Tupana yukuna. Jesucristo iphájeri majó, ri'imakáloje ina'uké wakára'ajeri penaje. Rejéchami rimájika piyukeja ina'uké nakú, mékeka rijló nakaje nala'akare marí eja'awá chu ne'emaká ketana: palá nala'akare ka'ajná, pu'uaré nala'akare ka'ajná. Rimaje ina'uké kaja taka'akaño nakú; rimaje kaja kajmuruna, re jo'ó kaja i'imakaño nakú, mékeka rijló nakaje nala'akare. ²Pa'apata ajopánajlo Tupana yukuna; piwe'epí pitukumó riká; pi'imá riyukuna wátaño rema'akánajlo, eyá ijnú wátakaño rema'akánajlo wa'ató. Pika'ata ne'iyajé Tupana puráka'alo aú, nala'akáloje palá raú penaje; pakha'á kaja neká raú, pu'uaré nala'akare pachá. Pila'á kaja ajopana pechu kaphí raú; pewíña'ata neká palá. Piyúcha'aniño najwa'até, unkaja ke nawe'epí rinakojé kiñaja. ³Akijñojo unká ina'uké wátalajeño kewákaje puráka'aloji jema'akana. Nakaje napechu nakú i'imakare, ke kaja nawátajika ajopana jewíña'ataka neká. Ñakele nakulaje najluwa ajopana newíña'atajeño penaje, newíña'atakaloje neká nawátakare kaje nakuja penaje. ⁴Napajno'otaje napéchuwa kewákaje puráka'aloji liyá, ke'iyapejé yuku ejo. ⁵Ñakeja pi'ijnatá palá pipéchuwa; pijña'á kaja chapú kaje panaku. Piwe'epí pitukumó Tupana i'imataka ina'uké kapichákajo liyá yukuna i'imakana

ina'ukejlo, rikaja kalé piwe'epeje pitukumó. Pila'á pijápaka'ala palá.

⁶Yewicha riphaka rená chojé nojló, nuta'akáloje penaje. ⁷Nula'á nujápaka'ala kaphí nupechu i'imaká lokópa'alaja. Wátaño ajopana chá'atakana jecho'okajo aú, jecho'oño na'aká rená ejená. Jecho'ojero pechu ke kaja nupechu nujápaka'ala la'akana nakú. Nutaka'ajika ejená nu'umajé Jesucristo yukuna ajopánajlo; rejená kaja nupechu i'imajé Jesucristo chojé kaphí. Unká nócho'olajo richiyá. ⁸Wawakára'ajeri wani Jesucristo, rikaja kalé we'epiri wanaku kemakana palá, mékeka rijló nakaje wala'akare marí eja'awá chu we'emaká ketana. Riká a'ajeri nojló riwemí, ripalamane aú nula'akale palá. Ñaké kaja ra'ajika riwemí íki'i wátakaño Jesucristo pa'akó majó wakajejlo, palani wani i'imajíkare.

Nakaje Pablo kemakare nakú Timotéojlo kaja penaje marí

⁹Patá'ajla majó i'ijnakana nomaje meketana i'imajemi. ¹⁰Kaja Demas ja'apáñaari nuká; ri'ijná pajimila Tesalónica ejo. Tupana chaje íki'ika riwátaka nakaje marí eja'awá chu i'imakare, raú kalé ra'apáñaana nuká. Crescente, eyá Tito, kele unká kaja i'imalaño maare. Crescente i'ijnari ají ke Galacia te'eré ejo, eyá Tito i'ijnari Dalmacia te'eré ejo. ¹¹Rikaja kalé Lucas nujwa'até maare. Eko pikulá Marcos; piwa'a riká pijwa'ató majó, ra'achí nuñathé maare nujápaka'ala la'akana aú. ¹²Kaja nuwakára'a Tíquico pajimila Éfeso ejo. ¹³Pi'ijnajika ee majó, pijña'á majó no'orumaká nakiyana nuyuríkare pajimila Troas e i'imaká, Carpo ñakaré chu riká. Pijña'á kaja majó nupapérane piyuke; richaje íki'ika nuwátaka pijña'aká majó nupapérane nulana'akare chojé.

¹⁴Alejandro, pejru'uwá nakú jápajeri, la'arí nuká chapú wani i'imaká. Tupana ko a'á rijló chapú rila'akare nuká wemí. ¹⁵Pi'imá u'upejlú riliyá, kaja chapú wani ripechu Tupana puráka'alo wa'apátakare ajopánajlo nakú.

¹⁶Nukeño'oká wakajé wate'eré eyaje wakára'ajeño wa'até pura'akano nuchayo, piyuke nujwáke'ena ja'apáñaano nu'umaká. Nuwata Tupana amako nachaje. ¹⁷Unká Tupana ja'apáñaala nuká; rila'á kaphí nupechu, nu'umakáloje riyukuna penaje. Tupana i'imataka ina'uké kapichákajo liyá yukuna nu'umá unká judíona kalé nakiyánajlo. Tupana i'imatari nuká nupinana liyá, nakapichátaka piyá nuká. ¹⁸Tupana i'imataje kaja nuká ajopana nupinana liyá. Piyuke chapú kaje yajwé nomájikare liyá wa'ató ri'imataje nuká, nu'umakáloje rijwa'até je'echú chu penaje. Re

i'imakaño wakára'ajeri riká. Palá wani napura'ajiko Tupana nakú wa'ajini wani. Marí keja ri'imajika.

¹⁹Eko palá Prísca, Áquila, kélejlo. Eko palá kaja Onesíforo, riyani jaló, kélejlo. ²⁰Erasto yuriro pajimila Corinto e. Nuyurí Trófimo Mileto e; ritami ri'imaká aú nuyurí ri'imaká rejeja.

²¹Patá'ajla majó i'ijnakana yawijá piyá. Ebulo, Pudente, Lino, Claudio, piyuke Jesucristo ja'apiyá jema'ajeño i'imakaño maare, kele kemaño pinaku: “Eko palá rijló”, ke.

²²Nuwata wawakára'ajeri Jesucristo i'imaká pijwáke'ewe; nuwata kaja Tupana la'aká iká palá re i'imakaño piyukeja.

Kaja.